

Date – 20/08/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- 1. Ni 2 awh Mizoram legislative assembly fur thukhawm chu vawiin hian tan a ni ang.**
- 2. Kolasib District chhung bika tun hnaia kawng chhe lutuk avanga mipuite harsatna tawh dan leh chak zawka thawm that dan tur chungchang Kolasib DC hovin nimin tlai khan ngaihtuah a ni.**
- 3. Kolasib District chhunga National Highway te lirthei zawh hleihtheih loh khawpa a chhiat avanga an lungawilohna lantir nan lirthei a eizawngtu pawl hrang hrang ten Ningani atangin tiamchin awm lovin kawngpui danchah an rel.**
- 4. Ni thum cham tura lo zin Malaysian Prime Minister Anwar Ibrahim chuan nizan khan New Delhi alo thleng.**

<><><>

SESSION

Ni 2 awh Mizoram legislative assembly fur thukhawm chu vawiin hian tan a ni dawn a,

Sorkar atangin dan siam tura duan 5 a lut tawh a, Assembly secretariat atanga thudawn danin dan thar siam tur 1 leh dan dinglai simthat tura rawtna 4 nimin thleng khan a lut tawh a. House chhunga chhan tur chi (starred question) 263 leh ziaka chhan chi (unstarred question) 17 a lut tawh bawk a. Hei bakah hian Social Welfare & Tribal Affairs minister Pi Lalrinpuii hnen atangin official resolution putluh tur an dawng tawh bawk. Assembly inkhawmah hian MLA hlui, Gorkhali hnam zinga Mizoram assembly-a MLA atana ruat hmasak ber leh awm chhun Pu Kapoor Chand Thakuri sunna hun an hmang dawn a. Pu Kapoor Chand Thakuri hi kum 1972 a Mizoramin UT a nih ruala assembly a neih khan Pi Saptawni leh Pu Lalhmingthanga te nen ruat seat-ah, khatih lai a Mizo Union sorkar khan a dah a ni a. Kumin July ni 15 khan Nepal khawpui Kathmandu-ah a thi a ni.

Assembly Fur thutkhawm hi August ni 20 a tan turin larsap Dr. Hari Bambu Kambhampati chuan a ko a. August ni 1 khan Speaker Pu Lalbiakzama kaihhruai Business Advisory Committee (BAC) thukhawm chu inkhawm hi ni 2 ni tura relin August ni 20 leh ni 21 khian an thukhawm dawn a ni.

<><><>

CM

Lunglei High Powered Committee chu an Chairman Pu Lalduhoma, Chief Minister hovin a office ah nimin khan an thukhawm a.

Chief Minister chuan, sawrkarna an kalpui hnu deuh lawkah MP election Model Code of Conduct in a phuar avangin an tum angin HPC an thukhawm hma thei ta lo tih a sawi a, thutkhawm chu Aizawl ah tanin, nakinah chuan Lunglei lamah an la thukhawm zel dawn a ni a ti. Lunglei mipuiten an duhsakzia an hria a, mitin an hmu a. Sawrkar hian mipuite lakah rulh tur tha ba tam tak a nei tih a hrereng a ni, a ti.

Meeting-ah hian HPC dan ang taka kalpui dan tura hmalak an rel bakah Lungleia Multi Level Car & Smart Parking leh Ring Road project siam an rel a. HPC Fund hman dan phung pawh tlem tihdanglam an rel a ni. Heng bakah hian Serkawn Bazar Shed thar sak chungchang te, Agricultural link road laih chungchang te, Mizoram chhim lama Airport siam chungchang leh thil pawimawh dang te an sawi bawk.

He meeting-ah hian Vice Chairman Pu V. Malsawmtluanga MLA leh HPC member te Pu Lalramliana, MLA, Pu T. Lalhlimpuia, MLA, Pu R. Lalthazuala, MCS, Member Secretary & Lunglei DC leh non-official member te an tel a ni.



KOLASIB ROADS

NH 306, Kolasib District chhung bika tun hnaia kawng chhe lutuk avanga mipuite harsatna tawh dan leh chak zawka thawm that dan tur chungchang ngaihtuahin nimin tlai khan Kolasib DC Conference Hall ah Kolasib DC, Pu Robert C. Lalhmangaiha kaihhruai meeting neih a ni a,

DC chuan Ruahtui tlak chhung chu October hawl pha tura ngaih a nih avangin engtingge hemi hun chhung hian mipuite harsatna chhawk zangkhai anih ang tih hi kan ngaih pawimawh hmasak tur a ni, a ti a. DC chuan Kâwnpui leh Bualpui khaw zirlai nu leh pa aiawh kalkhawmte hnenah an faten school an tlai thin chu pawh a tih thu sawiin, school tan hun diktaka tan a, an let leh lamah pawh an in theuha hun taka an thlen theih nan theihtawp a a hma an lak tur thu a hrilh a. He meeting-a tel ve lirthei neitu Joint Committee pawh an Press Release siam tak chungchang ah mipuite a nghawng tur ngaihtuah a, an thu tih tluk tawhte ngaihtuah tha leh turin a ngen bawk a ni.

Thutkhawmnaah hian a bik takin RTP Sethawn leh Kawnpui /Bualpui quarry inkâr, kawng chhiat avanga lîrthei tangkhang rei thei lutukte tih ziaawm theih dan tur sawiho a ni a. A khuar zual lai hun tiam chhunga hnawh te, zirlai naupangten zirna in a hun taka an thlen theih nan zing lam School kal hun leh tlai ban hun chhung a motor lian (HMV) tlân phal loh hun siamte rel a ni. Traffic movement felfai tak a awm theih nan Sethawn leh Kawnpui/Bualpui Quarry inkarah hian zan lamah SP Office lamin traffic duty an dah anga, chhun lamah NHIDCL Contractors mi rawih ten an vil ve thung dawn bawk a ni. Kawng dinmun chungchang en thlithlai leh review nei thin tur a Working Committee din rel a ni bawk.

Hethutkhawmna ah hian DC office-a officers te, SP Kolasib leh a thawhpui police hotute, NHIDCL hotute, Kawnpui SDO (C), MPWD Sr. EE (NH), contractors te, Kâwnpui leh Bualpui school naupang nu leh pa aiawhte,

Kawnpui, Bualpui leh Thingdawl VC member te leh lirthei neitu Joint Committee hruaitute an tel a ni.



KOLASIB DIST PROTEST

Kolasib District chhunga National Highway te lirthei zawh hleihtheih loh khawpa a chhiat avanga an lungawilohna lantir nan lirthei a eizawngtu pawl hrang hrang ten Ningani atangin tiamchin awm lovin kawngpui danchah an rel.

Lirthei a eizawngtu pawl hrang hrang panga hruaitute chuan nimin khan Kolasib Press Club ah chanchinbumite kawm in, tunkar ningani chawhma dar 10 atangin tiam chin awm lova Kawngpui dan chah an tum thu an sawi a.

He hunah hian Kolasib District Truck Owners Assn.(KDTOA); Mizoram Tripper Assn.(MTA), Kolasib Sub-Hqrs., Mizoram Truck Drivers Assn. (MTDA); Kolasib District Driver's Welfare Joint Action Committee (KDDWJAC) leh Kawnpui Town Drivers Assn. (KTDA) hruaitute chuan Kolasib District chhunga National Highway -Vairengte atanga Sairang leh Bairabi atanga Kolasib chu a chhe nasa hle tih an sawi a. Mizoram mipuite nitin mamawh lakluhna kawngpui pawimawh ber a chhiat avangin hun rei tawh tak atangin Kolasib Bawrsap kaihhraina in pawl hrang hrangten Kawngpui siam that anih theih nan hmalak ani tawh chungga ngaih pawimawh a hlawh lo chu pawl an tih thu an sawi.

Kawng enkawltu NHIDCL leh Contractor ten lirthei zawh hleih theih loh khawpa an chhuah tak avangin tunkar ningani chawhma dar 10 atangin tiam chin awm lovin kawng dan chah an tum tih an sawi a. Kolasib District huam chhunga National Highway ah lirthei eng chi mah tlanlo turin an ngen tih an sawi a, Mizoram sorkara PWD Minister leh Kolasib bialtu MLA -Dy Speaker te pawhin Kolasib District chhunga Kawngpui chhia te chei tha tura NHIDCL leh Contractor te an ngenna pawh pawisa duhlotu NHIDCL leh an hnuai Contractor te chu August thla ral hma ngeia Kolasib District chhuahsan tur leh an aiawh hnathawk thei tur Contractor dah thui turin Mizoram sorkar an ngen tih an sawi a ni.

Kawng dan chung hian Dan leh thupek kengkawhtu Magistrate leh Police te, Medical duty te, Zirlai, sikul kal phurtu lirthei te, PHE leh Electric department hnuai hnathawka duty te, damlohna leh chhiat tawhna avanga harsatna tawh leh Press mite a huam dawn loh thu an sawi.

LUNGLEI

Lunglei leh Tlabung inkar NH 302 kawngpui chhiat avanga Tlabung leh Lunglei inkar a tlan Maxi Cab te karkhat dawn an chawlh hnuin, vawiin atangin service leh turin inremna siam a ni a,

Nimin khan Addl DC Lunglei kaihhruiin Maxi Cab neitu te leh Contractor NHIDCL leh RBN Infra. Pvt Ltd ten chuan inremna hi an ziak a, an inrem dan chuan Contractor te hian hnathawktu a tam thei ang ber ruaiin Hauruang leh Pachang inkar, Pachang leh Phairuankai inkar te chu ni 5 chhungin an siam tha tur tih a ni a. An hnathawh dan kimchang, khawl hman

zat leh mihring zat, hnathawk lai thlalak te chu DC Office ah pek zel tur niin, DC office lam pawhin a vil zui reng tur a ni tih leh Maxi Cab neitu lam pawhin Contractor te chungah tharum an thawh tur a ni lo tih te ziak a ni.

Inrem naah hian Addl DC Lunglei, Tlabung SDO(C), DTO Lunglei, NHIDCL & RBN aiawh leh Maxi Cab neitu President ten hming an ziak a ni.

<><><>

EDUCATION MINISTER

Education Minister Dr.Vanlalhlalan, Zirtirtu sem rual chu huai takin an kalpui dawn a ti a, transfer dan phung fel zawk, thingtlang lama rei tak awm tawhte leh khawpuia awm rei tawh sawnchhuah ngaite an awm a. Hei hian zirna a siamtha dawn em tih ngaihtuah chungin fimkhur leh dik taka kalpui tum a ni, a ti.

Nimina an party inkhawm Aizawl ZPM Office a neihah thusawiin Dr.Vanlalhlana chuan, an manifesto-a mi Education Department-ah zirtirtu sem rual huai taka kaltlangpui an tum tih chu an bawhzui mek a, Education Consultant leh Education Reforms Committee ruahmanna hnuaiah kum thum chhunga Education n kalpui dan tur duan a ni tawh a, zirna atangin moral reform siam tum a ni bawh a ti.

Education Minister chuan Sawrkar report thar ber tarlangin, Mizoramah sawrkar school 257-ah zirlai 1,30,000 vel an awm mek a, zirtirtu 10000 vel bawr an awm mek bawh a. School Education Department hnuaiah Directorate, district office, Samagra, SCERT, DIET, Adult Education leh MBSE te an awm mek a, Higher & Technical Education hnuaiah College 20 chuang awmin Polytechnic College, Hindi College, Scholarship Board bakah board hrang hrang an awm bawh.

<><><>

KOLASIB CRIME

Kumin January thla atanga August thla kallai thlenga Kolasib District chhunga suahsualna leh thil duhawmlo thlen dan thlirhona -Crime meeting for Kolasib District neih nimin khan DIG Northern Range Pu H. Ramthlengliana hova neih a ni a,

He meetinga tarlan anih danin kumin January atanga nimin thleng khan Kolasib District ah thubuai ziahluh 136 a awm a, heng zinga 77 chu thubuai chhui zawh a ni a, thubuai 59 chu chhui mek a ni a, thubuai dang 24 chu Court in thuremna siam fel tawh niin, case dang 53 erawh court ah chinfel tura awm mek a ni.

January - August inkarah hian tualthah thubuai 3 awm in, mi In rawk thubuai 25; rukruk thubuai 46; Ruihhlo kaihnawih thubuai (ND & PS Act) 13; Section 4/6 hnuaiah POCSO thubuai 8; section dang hnuaiah POCSO thubuai 3; Zu khapna dan (MLP Act) hnuaiah zu man sak thubuai 16; mi kutthlak thubuai 6 leh thihna thleng khawpa lirthei chetsualna thubuai ziah luh 3 te chu thubuai langsar ani.

Kolasib SP Pu David H. Lalthangliana kaihrui meetingah hian DIG (NR) Pu H. Ramthlengliana chuan, police hna chu hna zahawm leh thawhrim ngai tak ani a ti a, mipuite himna tura hnathawh chu an hna pui ber anih thu a

sawi a, an hna te tha taka hlen turin taksa fit leh hrisel tha neih a tul thu sawiin, taksa hrisel an neih theih nan Zu, Ruihhlo leh zuk leh hmuam ah fihlim theuh turin kalkhawmte a chah a ni.

<><><>

MALAYSIAN PM

Ni thum cham tura lo zin Malaysian Prime Minister Anwar Ibrahim chuan nizan khan New Delhi alo thleng. PM Ibrahim hi airport ah Union Minister of State for Jal Shakti and Railways V Somanna chuan a lo hmuak a. Prime Minister anih hnua India alo tlawh hmasak ber a ni.

Vawiinah PM Modia leh PM Ibrahim te hian India leh Malaysia thawhdunna hrang hrang bakah khawvel thilthleng pawimawhte an sawidun dawn a. Heng bakah hian President Draupadi Murmu leh External Affairs Minister S Jaishankar te a hmu baw k ang.

External Affairs Ministry chuan thuchhuah siamin India leh Malaysia te hian hmanlai ata tawh inzawmna nghet tak an nei tih a tarlang a. Kum 2015 khan an thawhdunna chu Ehancec Strategic Partnership ah tihsan a ni a ti.

<><><>

DOCTOR PROTECTION

Sawrkar laipui chuan sawrkar laipui enkawl damdawiinah venhimna hna thawktu zaa 25-a tihpun a remti. Sawrkar thuchhuah danin sawrkar damdawiinte mamawh ang zelin venhimna tura inkaihhruaina baka marshal te dahluh dan pawh siamthat a ni. Ramchhung hmun hrang hranga dawmdawiina thawk doctor-te chuan tunhnaia Kolkatta-a hmeichhe doctor pawngsual leh thah anih avangin ahma aia khauha venhimna kalpui turin sawrkar an phut nasa hle a. State leh UT 26 chuan healthcare-a thawktute venhimna dan khauh tak an nei mek a ni.

<><><>

PM MANN KI BAAT

Prime Minister Narendra Modia chuan tun Pathianni chawhma dar 11 khian Akashvani kaltlangin mipuite hnena thu a sawina Mann Ki Baat programme a hmanng leh dawn a. Mizo tawnga lehlinin a zui ang. Tun tumami hi episode 113-na tur a ni.

Akashvani leh Doordarshan, AIR News website leh newsonair mobile app ah te ngaihthlak theih a ni ang a. AIR News, DD News, PMO leh Information and Broadcasting Ministry Youtube channel ah te livestre am a ni ang.

<><><>